

国朝耆献类征初编

國朝耆獻類征初編

國朝耆獻類徵初編卷五十七目錄

卿貳十七

徐乾學 弟秉義

錫勒達

李先復

徐潮 子杞
孫以烜

補錄

徐乾學

國朝耆獻類徵初編卷五十七

通奉大夫前署江西巡撫江西布政使司布政使湘陰李桓輯

卿貳十七

徐乾學

弟秉義

徐乾學江南崑山人康熙九年一甲三名進士授編修十一年充順天鄉試副考官以給事中楊雍建劾奏副榜遺取漢軍卷與正考官修撰蔡啟傅並降一級調用十四年援例捐復原級仍任編修尋遷左春坊左贊善充日講起居注官二十一年充明史總裁官二十二年遷翰林院侍講二十三年遷侍講學士時乾學之弟元文以左都御史降調候補其子樹聲與乾學子樹屏並中順天

鄉試 聖祖仁皇帝以是科取中南皿卷皆江南浙江而湖廣江西福建無一人下九卿詹事科道磨勘舉出文理悖謬者一名文體不正者樹屏等三名字句疵累者樹聲等八名請與正副考官諭德秦松齡編修王沛恩同考官主事張雄中書王鐸等並褫革嚴究情弊得 旨此次取中各卷顯有情弊姑從寬免究其文理悖謬文體不正四名及徐元文之子並革去舉人餘照例議處是年十二月乾學遷詹事二十四年正月 召試翰詹諸臣於 保和殿乾學列上等第一 諭獎乾學暨侍讀韓茨編修孫岳頒侍講歸允肅編修喬萊等五人學問優長文章古雅優加賞賚乾學旋奉 命直南書房擢內閣學士充大清會典一統志副總裁教

習庶吉士時海賊初平戶部郎中色楞額往福建稽察鼓鑄疏請
禁用明代舊錢戶部尙書科爾坤余國柱等議如所請 上以詢
內閣諸臣乾學言自古皆新舊兼行以從民便若設例禁恐滋煩
擾因考自漢至明故事爲議以獻 諭曰舊錢流布不止福建一
省他省亦皆有也若驟爲禁止恐不肖之徒借端生事貽害平民
色楞額所奏不准行會有 詔購采遺書乾學以宋元經解十種
李燾續資治通鑑長編及唐開元禮或繕寫或仍古本綜其體要
條列奏進得 旨所奏進藏書善本足資考訂俱畱覽二十五年
諭吏部曰學士徐乾學張英學問淹通宜畱辦文章之事嗣後
勿開列巡撫尋授禮部侍郎充經筵講官二十六年九月擢都御

史二十七年二月充會試正考官卽於是月遷刑部尙書乾學初任左都御史卽劾罷江西巡撫安世鼎勸諸御史風聞言事遇會議會推與尙書科爾坤佛倫等多齟齬其會議河工屯田事也同尙書張玉書言屯田所占民間地畝應歸舊業科爾坤佛倫弗從御史陸祖修因疏劾科爾坤佛倫等徧袒河臣靳輔不顧公議御史郭琇亦劾靳輔興屯累民 敕罷靳輔任先是 命侍郎色楞額往湖廣鞫上荆南道祖澤深被劾各款并察巡撫張汧有無穢蹟色楞額於劾款悉爲開釋又不察劾張汧御史陳紫芝旋劾張汧貪黷 命副都御史開音布往會直隸巡撫于成龍山西巡撫馬齊覆審旣鞫實張汧祖澤深婪索事復得祖澤深交結大學士

余國柱爲囑色楞額徇庇及張汧未被劾時遣人赴京行賄狀下
法司嚴議覈擬時余國柱因御史郭琇劾其與大學士明珠尙書
佛倫等營私附和已罷歸法司請檄追質問並鞠詰張汧行賄何
人汧以分餽甚眾不能悉數抵塞旣而指出乾學 上命免余國
柱質問復 諭曰此案嚴審牽連人多就已經審實者卽可擬罪
勿令滋蔓於是色楞額張汧祖澤深論罪如律事遂寢互詳高士
奇傳乾學尋乞罷疏言臣蒙特達之知感激矢報職掌所繫務殫
區區苞苴餽遺一切禁絕近者前任楚撫張汧橫肆污蠹祇緣臣
爲憲長拒其幣問是以銜憾誣扳幸 皇上鑒臣惻惻當眾臣傳
問汧供語參差駕虛鑿空良心難掩隨即自吐實情然非 聖明

在上是非幾至混淆此臣所以感戴 高深日夜隕涕者也臣備
位卿僚乃爲貪吏誣搆 皇上覆載之仁不加譴斥臣復何顏出
人 禁近有玷清班反躬刻責不能自己伏冀 聖慈放歸田里
疏入得 旨覽奏情辭懇切准以原官解任其修書總裁等項著
照舊管理二十八年乾學弟元文任大學士子樹穀由中書考選
御史時解任修書少詹事高士奇丁憂在籍左都御史王鴻緒爲
左都御史郭琇疏劾植黨營私招搖撞騙諸款得 旨休致事詳
士奇鴻緒傳副都御史許三禮疏劾乾學曰 聖主必需賢佐懲
貪不外遠奸大小臣工幸逢 聖主應爲賢臣乃有原任刑部尙
書徐乾學者不顧品行律身不嚴致被罪臣張汧所供 皇上寬

仁不加譴責卽宜引咎自退乞 命歸里又復優柔繫戀潛住長
安乘畱修史爲名出入 禁廷與高士奇相爲表裏物議沸騰卽
無官守落得招搖納賄五方寶物歸東海之謠所自來也其子試
御史徐樹穀不遵成例朦朧與考明有所恃獨其弟徐秉義文行
兼優實係當代偉人原任禮部尙書熊賜履理學醇儒可稱千古
人品臣職居言路知而不言卽爲不忠俯採輿論直陳賢奸乞卽
召用熊賜履徐秉義以佐 盛治徐乾學旣無好事業焉有好
文章應逐出史館以示遠奸徐樹穀尙書之子中堂之姪身爲御
史太覺招搖應調部屬以遵成例臣不避嫌怨披瀝直陳得 旨
所參事情著徐乾學明白回奏熊賜履原係簡任大臣朕所深知

已經起用見在丁憂許三禮請卽召用殊屬不諳著飭行乾學回奏曰憲臣謂臣律身不嚴致罪臣張汧所供臣若果受張汧一錢臣甘寸磔祇以臣爲臺長聞張汧狼籍屢向僚屬斥言其非汧知而憾臣遂肆誣讎業蒙 皇上洞鑒臣以性不諧俗遭人嫉忌具疏懇歸田里蒙 恩准解部務仍領各館總裁早夜編摩每隔數日入直與高士奇等共訂書史校讐 御選古文此外一無干涉臣在任之日尙且嚴絕苞苴豈解任以後反行招搖納賄憲臣忽云潛住忽云招搖皆臣所惶惑不解者臣子樹穀考選經吏部及臣弟元文奏明其時大臣子弟與考者不止臣子一人 特恩簡用安得朦朧皆由臣平時好講忠孝大義言論時或激切易以招

尤乞 賜罷斥歸田并罷臣子官職以安愚分疏並下部察議以
所劾招搖納賄皆無實據卽所劾朦朧考選亦不詳確許三禮應
降二級調用議甫上三禮復疏劾乾學曰三品以上大臣子弟不
得考選科道成例遵行已久無敢紊越今乾學同奏指稱吏部題
請閣臣奏明以鉗制言官要知 皇上之畱乾學者畱於史館辦
事豈畱潛地招搖物議沸騰閣臣之奏明者不過奏避閱卷之嫌
疑豈有題破歷來之定例乾學雕琢字眼粉飾要旨欲坐臣以指
參不實而使徐樹穀仍居御史之職明欲肇釁開端紊亂國制專
擅之漸不可不防更奇者乾學律身不嚴教子無方穢蹟昭著有
案可據尙敢肆口狂言好講忠孝大義希圖簒惑 聖聰不得不

列款糾參懇乞窮究一乾學於丁卯鄉試戊辰會試在外招搖門生親戚有名文士各與關節務期中試有蘇州府貢生何焯往來乾學門下深悉其弊特作會試墨卷序文刊刻發賣寓言譏刺乾學聞知卽向書鋪將序抽燬刻板焚化囑託江蘇巡撫訪拏何焯至今未結一乾學發本銀十萬兩交鹽商項景元於揚州貿易每月三分起利本年七月閒令伊孫壻史姓家人李湘押同景元於八月二十四日到京算帳共結本利一十六萬餘兩又布商程天石新領乾學本銀十萬兩見在大蔣家衡衡開張當舖其餘銀號錢店發本放債違禁取利怨聲滿道一乾學以門生李國亮爲江蘇按察使代爲料理國亮差劉管家送銀一萬兩交乾學管家吳

子彥吳子章收遇節送銀四百兩小禮銀四十兩生日送銀一千兩吳子彥爲張汧事發逃回吳子彥胞弟子章收伊弟元文入閣辦事國亮差劉管家送賀禮銀五千兩交吳子章收繳一乾學認光棍徐紫賢徐紫書二人爲姪通同扯緯得贓累萬徐紫賢徐紫書見造爛面銜衙花園房屋書辦之子一朝富貴胡爲乎來乾學之贓半出其手一乾學因弟拜相後與親家高士奇更加招搖以致有去了余秦檜來了徐嚴嵩乾學似龐涓是他大長兄之謠又有五方寶物歸東海萬國金珠貢澹人之對京城三尺童子皆知若乾學果能嚴絕苞苴如此醜語何不加之他人而獨加之乾學耶一乾學遣弟徐宏基徧遊各省抽豐剋剝民膏獨於河南磁州

彰德等處久戀一載有餘放賭宿妓良民受害怨聲載道一乾學買憲臣傅感丁在京房屋一所價銀六千餘兩買學臣孫在豐在京房屋一所價銀一千五百兩買慕天顏無錫縣田一萬頃京城繩匠衚衕與橫街新造房屋甚多不能枚舉蘇州太倉崑山吳縣長洲常熟吳江等州縣俱係徐府房屋田地一乾學子姪徐樹屏徐樹聲於甲子科貢緣中式弊發黜革行止有虧莫此爲甚以上各款百未盡一乾學身受國恩乃敢植桃李於一門播腹心於九州橫行聚斂不顧枉直順之則生逆之則死勢傾中外權重當時朝綱可紊成例可滅伏乞皇上立賜處分國家幸甚萬民幸甚疏入得旨許三禮身爲言官凡有糾劾當據實一併指陳乃

於交部議處後復列款具奏明係圖免己罪著嚴飭行 命免許
三禮調用仍畱任是年十一月乾學疏言臣年六十精神衰耗祇
以受 恩深重依戀徘徊憲臣許三禮前因議先賢先儒坐位其
言不合經典臣與九卿奏對之時斥言其非本以公事相爭不謂
觸其私怒捏造事款逞忿劾臣幸 聖主洞燭幽隱臣欣荷再生
但臣方寸靡甯不能復事鉛槧且恐因循居此更有無端彈射乞
恩終始矜全俾得保其衰病之身歸省先臣邱隴庶身心閒暇
願比古人書局自隨之義屏跡編摩少報萬一得 旨卿學問淹
博總裁各館書史著有勤勞覽奏請歸省墓情辭懇切准假回籍
書籍著隨帶編輯明年二月陛辭 賜御書光燄萬丈扁額五月